



Los Laga Bai ta gradici

DIASABRA atardi dia 16 di februari ultimo, Los Laga Bai a celebra conhuntamente cu tur e miembronan di Los Laga Bai y e sponsornan un otro exitoso temporada di Aruba su Carnaval. Esaki a tuma lugar na cas di Rudolf Croes, mihor conoci como Hofi Den Den. N'e ocasion aki John Fingal

y Maas van Drie a gradici tur hende pa nan tremendo colaboracion un biaha mas pa cu e organisacion di Los Laga Bai.

Na mes momento nan a presenta na tur miembro di Los Laga Bai un cuadro specialmente traha pa Los Laga Bai.

Riba e cuadro aki tabatin caricatura di cada un di e miembro y colaboradornan di Los Laga Bai. Esaki tabata un sorpresa cu a cai na agrado di tur hende presente.

E lidernan di grupo Los Laga Bai kier a gradici tur persona cu a participa e aña como e Bailadonan di SOLO. Danki na boso tur Los Laga Bai a bai un biaha mas cu e premio di Grupo Ambiente na San Nicolas y Oranjestad. Alabez Los Laga Bai kier a felicita Robert Jeand'or & Su Solo Banda Show pa nan premio di "Band of the Year" p'e di dos aña consecutivo. Un premio sigur sigur bon mereci.

Tambe nos kier a manda palabla di gradicimento pa tur e sponsornan di Los Laga Bai cu e aña aki atrobe a duna nan aporte hopi balioso na loke t'e organisacion di Los Laga Bai. Nos kier a gradici en specialmente Patrick Melchior di Heineken pa su añanan di colaboracion estrecho cu Los Laga Bai y duna hopi felicitacion y a desee tur clase di exito y duna un Bon Bini na Hans Mondria (kende sigur no ta un hende desconoci den Los Laga Bai) como General Manager nobo di Heineken Aruba.

Pa tur participante cu ta interesa den wak y bestel e potretnan di Eric Boeldak, por pasa durante siman na KIA Motors. Esakinan lo ta disponibel pa tur hende pasa wak.

Por ultimo Los Laga Bai kier a participa cu nan a haña cobertura di dos pagina den Destination: Aruba, e revista di American Airlines. E articulo ta titula "Come As You Are" y ta refleha riba Los Laga Bai su historia como e grupo di Carnaval mas bieu na Aruba y como e Grupo di Ambiente.

Pa mas informacion bishita www.loslagabai.com